

CONSIDERACIÓNS XERAIS DE OBRIGADO CUMPRIMENTO A TER PRESENTE NO MOMENTO DE PRESENTAR A SOLICITUDE DE USO DE INSTALACIÓNS DEPORTIVAS MUNICIPAIS PARA A TEMPADA 2020/21.

É obxecto desta solicitude a asignación de usos das instalacións deportivas municipais xestionadas directamente polo Departamento de Deportes do Concello de Santiago e as conveniadas coa Universidade de Santiago (USC) para adestramentos, competicións deportivas preferentemente federativas, actividades escolares lectivas e actividades físicas destinadas a persoas con diversidade funcional.

Será de obrigado cumprimento por parte das entidades beneficiarias respectar a normativa de uso e funcionamento das instalacións deportivas (aprobada na Xunta de Goberno Local do 28 de novembro de 2011), as aprobadas pola USC e/ou calquera outra norma, circular ou directiva que se aprobe ao longo da tempada 2020/21.

Dada a situación de alerta sanitaria producida polo COVID-19 e ante a incertidume das súas consecuencias sobre a organización deportiva en xeral, os criterios tipo que se definen para este procedemento de solicitude de instalacións deportivas poderán modificarse en calquera momento e nos termos oportunos coa única intención de cumprir os requisitos e normas que as autoridades sanitarias poidan establecer ao efecto.

Inicialmente será de aplicación a efectos de establecer prioridades na ocupación dos recintos, os criterios marco empregados na resolución da tempada 2019/20 e dos que se deron conta na Xunta de Goberno de 1 de febreiro de 2019. Estes criterios marco defínense debido ao número limitado de recursos e instalacións dispoñibles que non permiten atender a demanda existente na súa totalidade, polo que se establecen tres niveis de prioridade:

- **1º NIVEL DE PRIORIDADE: propostas formativas lectivas, programas municipais e actividades que aglutinen a persoas con diversidade funcional.**
Daráselle prioridade ás actividades formativas, en especial, aquelas que están vinculadas cos centros de ensino públicos e concertados e ao desenvolvemento da materia de Educación Física escolar ou actividades lectivas obrigatorias. Igualmente ás actividades ou propostas a desenvolver polas asociacións que estean a traballar con persoas con diversidade funcional.
Dentro deste primer nivel de prioridade estarían os programas, actividades e campañas de promoción e/ou de organización directa municipal.
- **2º NIVEL DE PRIORIDADE: as actividades deportivas de ámbito federativo e as vinculadas co deporte escolar da Xunta de Galicia (programa XOGADE).**
Darase especial atención ao Deporte Federado e, polo tanto ás entidades deportivas da cidade que participan en competicións oficiais federativas.
As horas de fin de semana destínanse principalmente á celebración das competicións oficiais ou puntuais que poidan programar as entidades e que, á súa vez, estean recollidas nos calendarios federativos ou sexan previamente autorizadas pola Concellaría de Deportes
- **3º NIVEL DE PRIORIDADE: as propostas deportivas recreativas e competitivas non oficiais (segundo dispoñibilidade unha vez atendidos os niveis 1 e 2).**
As competicións e actividades deportivas non oficiais que se desenvolvan a través de entidades sen ánimo de lucro sempre e cando cumpran con todas as normas de aplicación.

CONSIDERACIÓNS XERAIS:

Importante salientar que a cesión dunha franxa horaria durante unha tempada, en calquera instalación, non implica que ese mesmo horario sexa cedido ao ano seguinte de forma automática polo feito de facer a solicitude. As asignacións de uso terán validez únicamente para a tempada obxecto de solicitude.

Terase como primeiro criterio dar cobertura ao mesmo nº de equipos/licenzas dos que dispuxo a entidade durante a tempada 2019/20, sempre que se manteña un nivel similar de estrutura. Este criterio será o máis importante e relevante no momento da reserva de uso da tempada 2020/21 tendo en conta as posibles limitacións de aforo que probablemente haberá que implantar cúa consecuencia non é predicible neste momento, pero que poden supoñer unha redución do número de usuarios por hora.

Seguidamente atenderanse os ascensos de categoría e, finalmente, os incrementos do número de equipos e licenzas segundo dispoñibilidade.

As situacións extraordinarias non recollidas dentro dos criterios expostos, poderán ser valoradas en función da dispoñibilidade de espazo.

Á hora de definir con carácter xeral os criterios de uso valorarase o carácter oficial da actividade, o número de equipos e ou licenzas federativas en competición, a categoría deportiva e a antigüidade da entidade na práctica regular e continúa da actividade obxecto de solicitude, así como, o correcto cumprimento das normas de uso das instalacións durante a tempada anterior.

Dado que o nivel de demanda supera por norma xeral a oferta de instalacións, no suposto de deportes colectivos, será necesario compartir o uso das instalacións con outros equipos (preferentemente da mesma entidade), para o cal o Concello establecerá un ratio en base á capacidade da instalación e o número de solicitudes.

As fins de semana están destinadas principalmente ao desenvolvemento de competicións de carácter oficial e federativo.

Durante as épocas vacacionais (nadal e semana santa) as instalacións dan cabida a outro tipo de propostas, de carácter principalmente deportivo, pero cun contido máis recreativo, favorecendo as iniciativas que procuran conciliar a vida laboral e familiar. Por este motivo, as cesións de uso que se fagan para a vindeira tempada suspenderanse durante os citados períodos.

A administración municipal quedará facultada para a modificación ou suspensión puntual do uso das instalacións en función das necesidades do Departamento de Deportes, ou no seu caso da USC, sen que a entidade afectada teña dereito a ningunha compensación ou alternativa. Neste suposto, notificarase tal circunstancia ao correo electrónico facilitado na instancia de solicitude cunha antelación mínima de dous días, sempre que sexa posible.

PRAZO DE SOLICITUDE:

O período oficial de solicitude de uso de instalacións deportivas para a tempada 2020/21 será do **19 de xuño ao 6 de xullo**, ambos inclusive.

LUGAR DE PRESENTACIÓN DAS SOLICITUDES:

1. Suxerímoslle que utilice o rexistro electrónico do Estado que permite presentar documentos para a súa transmisión electrónica a outras administracións públicas (comunidades autónomas, entidades locais etc.) integradas no sistema de interconexión de rexistros: <https://rec.redsara.es/registro/action/are/acceso.do>
2. Se non lle é posible presentar a documentación a través da canle indicada no apartado 1, pode contactar telefónicamente co Rexistro do Concello de Santiago de Compostela, que lle atenderá con cita previa. Teléfono para solicitar cita previa no Rexistro Xeral : 981 543 122

Tamén poderán presentarse nos rexistros e oficinas a que se refire o artigo 16.4 da Lei 39/2015 do 1 de outubro, de procedemento administrativo común das administracións públicas. Neste caso será obrigatorio remitir por correo electrónico ao Departamento de Deportes do Concello, nun prazo máximo de 48 horas, unha copia da solicitude presentada.

DOCUMENTACIÓN OBRIGATORIA A PRESENTAR:

As entidades solicitantes deberán presentar a través do Rexistro Municipal **unha declaración responsable (segundo modelo que se achega)** na que se indica as obrigas e compromisos que asumen as entidades interesadas acompañada dun formulario específico en función da instalación e/ou actividade obxecto de solicitude (campos de fútbol, pavillóns, pistas de atletismo,...).

Todas as entidades quedan obrigadas a cumprir cos protocolos que determine cada Federación, así como, coas instrucións e normas que se determinen polas autoridades sanitarias. O Concello de Santiago poderá solicitar protocolos propios a cada club se o estima necesario en función da evolución do COVID-19.

IMPORTANTE: As solicitudes con documentación pendente, atenderanse unha vez completada toda a documentación. As presentadas fóra de prazo atenderanse unha vez se realice o reparto xeral, e dentro das disponibilidades existentes.

SEGUROS OBRIGATORIOS:

As entidades deportivas beneficiarias asumirán os danos que se ocasionen a terceiros ou aos propios bens municipais con motivo da devandita utilización da instalación deportiva. A tal efecto deberán ter contratado —nos dez días seguintes á confirmación da cesión de uso definitiva ou provisional— a correspondente **póliza de responsabilidade civil** actualizada ao periodo obxecto de autorización, nos termos esixidos no artigo 8 e na disposición transitoria terceira da Lei 10/2017, de 27 de decembro, de espectáculos públicos e actividades recreativas de Galicia. Certificado desta póliza coa indicación das coberturas e periodo de vixencia deberá remitirse por correo electrónico obrigatoriamente no prazo anteriormente indicado dos dez días.

Todas as persoas usuarias das actividades desenvolvidas polas entidades beneficiarias deberán ter garantida a asistencia sanitaria. No prazo de dez días a partir da confirmación da cesión de uso, provisional ou definitiva, todas as entidades deberán presentar un certificado propio (asinado conxuntamente pola secretaría e a presidencia da asociación) conforme **todas as persoas participantes (incluídas as aspirantes ou en periodo de proba) dispoñen de licenza federativa e/ou da necesaria póliza de accidentes de seguro** que garanta dita asistencia sanitaria coa mesma cobertura para as persoas participantes que non estean federadas. Este certificado deberá remitirse por correo electrónico obrigatoriamente no prazo anteriormente indicado dos dez días.

De non presentar a documentación en prazo nin atender o requirimento que —de ser o caso— se lle practique suspenderase provisionalmente a cesión de uso inicialmente autorizada, podendo chegar a anularse se non existe resposta por parte da entidade afectada.

Desde o Departamento de Deportes poderase solicitar a xustificación documental das correspondentes pólizas así como, solicitar un incremento das coberturas e contía se o estima necesario.

RESOLUCIÓN INICIAL

Ao efecto de coñecer a resolución inicial prevista para a tempada 2020/21, as entidades solicitantes deberán de **contactar co Departamento de Deportes (981 528 730)** nas seguintes datas:

- Actividades vinculadas á campos de fútbol: do 28 ao 30 de xullo
- Actividades vinculadas co uso das pistas de atletismo: do 9 ao 11 de setembro.
- Actividades vinculadas con pavillóns polideportivos e ximnasios: do 16 ao 18 de setembro

En todo caso, **ESTES PRAZOS PODERÁN ADIANTARSE** se por parte da entidade solicitante existe a vontade de manter para a tempada 2019/20 a mesma (ou moi similar) carga de ocupación, horarios e instalación que a cedida para tempada 2018/19 sendo requisito obrigatorio e imprescindible dispoñer do mesmo número de equipos en competición.

O Departamento de Deportes resérvase a facultade de propoñer de xeito motivado a desestimación das solicitudes de uso daquelas instalacións que non reúnan as condicións reglamentarias para a práctica da modalidade proposta ou entrañen riscos ou molestias a outras persoas, sexan deportistas ou non.

Con independencia ao proceso de solicitude oficial de instalacións para a tempada 2020/2021, aquelas entidades que precisen —por razóns de calendario de competición ou causas debidamente xustificadas—, iniciar os seus adestramentos antes do mes de setembro, deberán comunicar por escrito ao Departamento de Deportes as súas necesidades co fin de poder atendelas, en función das instalacións dispoñibles. **De autorizarse o uso dalgún recinto, é obrigatorio cumprir cos requisitos definidos nesta convocatoria (seguro accidentes e de responsabilidade civil).**

A efectos informativos, salientar que dada a situación de incertidume que existe no momento da elaboración destas instrucións respecto do inicio das competicións da vindeira tempada, non se pode concretar con exactitude os períodos de peche dos recintos durante os meses de xullo e agosto, sendo probable que non estean operativos ata o 17 de agosto. Concretaranse no momento en que se dispoña de máis datos.

NORMATIVA DE USO E FUNCIONAMENTO DAS INSTALACIÓNS.

A normativa de uso e funcionamento das instalacións deportivas poderá ter modificacións nos vindeiros meses co fin de adaptarse ás instrucións e protocolos que se determinen polas autoridades sanitarias e deportivas como consecuencia da alerta sanitaria provocada polo COVID-19. En calquera caso, con independencia do establecido nas citadas normas, será de obrigado cumprimento por parte das entidades solicitantes e usuarios cumprir en todo momento coas instrucións, medidas e protocolos impostos para garantir o definido de cara a unha nova normalidade.

Xunto coa presente achégase unha **copia da normativa de uso e funcionamento das instalacións deportivas municipais**, así como, do campo polideportivo da USC, que serán de obrigado cumprimento por parte das entidades beneficiarias, polo que lle solicitamos que a transmita entre os adestradores e persoal vinculado coa súa entidade. O seu reiterado incumprimento conlevará a anulación da reserva de uso da instalación.

Dentro da citada normativa recóllense, entre outras, as seguintes cuestións:

- **Os horarios e días reservados para a súa entidade son intransferibles**, non podendo cederse a outro equipo, nin compartirse con outra entidade. As situacións puntuais sobre este respecto que se dean ao longo da tempada deberán ser solicitadas por escrito e precisarán da autorización previa do Departamento de Deportes. Os partidos amigables e/ou oficiais que se vaian a desenvolver durante as horas reservadas para adestramento (de luns a venres) precisaran da autorización expresa do Concello de Santiago e serán solicitados por escrito con suficiente antelación.

Así mesmo, a presente cesión é exclusiva para os deportistas vinculados coa súa entidade (adestradores, xogadores con ficha federativa, ...), sendo responsabilidade exclusiva da entidade permitir, de forma puntual, o acceso durante o horario reservado a persoas que non pertencen ao club.

- **O club poderá perder a súa reserva de instalación** se de forma reiterada e non xustificada:
 1. Non fai uso da mesma.
 2. Asiste cun número moi reducido de deportistas (menos de 7 en pavillóns e menos de 9 en campos de fútbol).
 3. Incumpre cos horarios cedidos para a tempada.
 4. Incumpre as normas de uso e funcionamento da instalación.
 - Se algún deportista ou persoa vinculada coa entidade tales como, adestradores, delegados, directivos, ..., **cometeran unha acción vandálica contra a instalación** (vestiarios, pista de xogo...), considerarase ao **club o responsable subsidiario** quedando obrigado a repoñer os danos producidos. A reiteración deste tipo de comportamentos ao longo da tempada **suporá a automática anulación de todas as horas** de uso das que dispoña a entidade, con independencia do equipo ou persoa que cometa a infracción.
 - No que respecta á competición (oficial ou amigable) a entidade, como organizadora, deberá de **adoptar as medias de seguridade e prevención** que sexan necesarias para garantir o correcto desenvolvemento da actividade, así como, respectar o aforo do recinto deportivo.
- Importante:** No caso de que se prevea para un determinado partido unha afluencia de público especial ou calquera outra circunstancia extraordinaria, a entidade deberá comunicalo por escrito ao Departamento de Deportes cunha antelación mínima de dous días hábiles para que se poidan adoptar as medidas oportunas, de non facelo así a entidade asumirá todas as consecuencias que se poidan derivar da falta de comunicación.
- **Co fin de contribuír a garantir a seguridade de todos os usuarios das instalacións**, os xogadores e adestradores deben informar aos conserxes dos desperfectos ou anomalías que observen nos diferentes espazos das instalacións e, moi especialmente, nos equipamentos deportivos que están a utilizar (porterías, canastras, ...)



Departamento Municipal de Deportes de *Santiago*



- **O conserxe da instalación ten autoridade suficiente e capacidade** para suspender ou anular a actividade deportiva ante o incumprimento na aplicación da normativa existente na instalación, accións incívicas ou agresivas que se produzan, ou se observa calquera outro tipo de circunstancia que ao seu criterio xustifique a suspensión da actividade programada.
- Os adestradores ou persoas responsables dos equipos deberán permanecer na instalación mentras existan deportistas menores de idade do Club utilizando o recinto, **prestando especial atención** ao uso e comportamento na zona de vestiarios. De non cumprirse esta norma, os deportistas terán que abandonar o recinto.
- Por último, salienta que **é condición imprescindible e obrigatoria** acceder ao recinto de xogo (pista polideportiva, campo de fútbol,..) con **calzado deportivo** específico e indumentaria adecuada, tanto os deportistas como adestradores e/ou delegados. O incumprimento desta cuestión conlevará a prohibición de acceso á zona de xogo.

INFORMACIÓN E CONTACTO

Para calquera aclaración ao respecto poden contactar coas oficinas do Departamento de Deportes no Estadio Municipal Verónica Boquete de San Lázaro en horario de 9 a 14 horas, chamando ao 981 528 730, ou a través da seguinte dirección de correo electrónico: deportes@santiagodecompostela.gal